

Protocol no. 110Sezzüda da gövgia, als 23 october 201408.00h – 11.00h

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Marco Fallet (protocol)

Protocol

Il protocol no. 109 da la sezzüda da marcurdi, als 8 october 2014 vain approvà.

984 021 FABRICA
Jochen Ganz; lavuors da sanaziun bain Ruinas

Seguond uffizi chantunal pel svilup dal territori das-chan gnir effectuadas be las lavuors previssas da sanaziun internas. Il rest (schler e tschuffa da laina i'l tablà) nu po seguond la ledscha gnir permiss. La dumonda vain trattada suot procedura d'annunzcha.

985 021 FABRICA
Erich Schweizer; vaidrina nouva fatschada vers nord; uffizina no. 519, parcella no. 461 a Tuols

La dumonda es statta publichada ed i nu sun entradas ingünas protestas. Seguond cumischiun da fabrica po il permiss gnir concess. Il cussagl til conced'uschè cun vusch unaima.

986 021 FABRICA
Andri Pua; surpassaggi per animals stalla no. 562; parcella no. 1040 a Tuols

In connex cul surpassaggi previs sur la foura d'aldüm vain eir construida üna chaista da lain sco pozza per tala. La dumonda es statta publichada ed i nu sun entradas ingünas protestas. Il cussagl conced'il permiss cun vusch unanima.

987 021 FABRICA
Armin Rütthard; müdamaints da proget – lobjias fatschada vers süd e s-chala interna

La dumonda da müdamaint dal proget es statta publichada ed i nu sun entradas ingünas protestas. I's tratta d'ün schlargiamaint da las 6 lobjias da 0.60m sün 1.44m. Il cussagl va d'accord culla proposta da la cumischiun, pretenda però implü cha la part da la lobjia chi's stenda vers inaint illa chasa vain realisada in betun e na sco previs cun üna spuonda da metal. L'otezza da la spuonda ha d'importar 1 m e tala ha dad esser piazzada vertical.

988 021 FABRICA
Società in condomini chasa Posta Sent a Sot Pradè

Vi da la lobjia pro la fatschada vers süd ston gnir effectuadas lavuors da sanaziun per garantir la sgürezza. La dumonda es gnüda trattada suot procedura d'annunzcha.

989 790.501

Proget planisaziun cumünala
Examinaziun preliminara davart l'uffizi chantunal

Il schef da planisaziun preschainta la fatschenda e repassa tala in basa dal protocol da la sezzüda da la cumischiun da planisaziun dals 21 october 2014. Id es da manzunar, cha l'uffizi chantunal ha insè trattà ed approvà be 4 puncts, uschè chi's sto discuorrer d'üna revisiun parziala e na d'üna totala.

Zona da mansteranza Pozzè

L'ingrondimaint da la zona a Pozzè cumpiglia eir üna part da la parcella no. 953, in possess privat. Fin uossa es quella surfatscha da 1059m² gnüda tratt'a nüz sco plazzal per depositaar material ed indrizs da fabrica. Tras ün'ev. ingrondimaint, incl. la surfatscha surmanzunada, survgniss quel terrain üna plüvalur. La cumischiun propuon'al cussagl da fixar la procentuala per l'indemnisaziun sün 30% (inchasch da la plüvalur / Mehrwertabschöpfung). Cun quel proceder va il cussagl d'accord.

In quist connex sto eir gnir tgnü in ögl da sclerir, scha'l provedimaint d'aua Val da Muglin saja sufficiaint eir davo l'ingrondimaint da la parcella.

Finischiun «Pista dal Sömmi» a Pradè

La varianta chi prevezza la finischiun da la pista a Pradè es tenor la cumischiun l'unica realistica. Illa documainta da planisaziun es previs da zonar aint nouv la surfatscha pro la finischiun da la pista sco zona per edifizis e stabilimaints publics (ZESP / ZÖBA). La zona da fabrica per quella part pro'l üert dal Palazzi, in possess privat, gniss recumpensada illa part ost dal üert.

Arch da bivgnaint a Sot Crusch

A regard il lö definà pel arch da bivgnaint da Daniel Cotti, propuona la cumischiun d'inchaminar quella via e spèra chi vain concess il dret per installar las duos construcziuns da fier e betun a Sot Crusch. Cun quai va il cussagl d'accord.

Ledscha da fabrica

Culs müdamaints dals artichels 30a, 51a e 70 da la ledscha da fabrica, ils quals tangheschan la revisiun da la zona Pozzè e la finischiun da la pista dal sömmi a Pradè, va la cumischiun eir d'accord. Uschè füssan quists adattamaints eir üna part integranta da la revisiun parziala. Cun quai va il cussagl d'accord.

Il cussagl va d'accord cul preschantà survart e decida da suottametter la fatschenda a la radunanza dals 5 november 2014 per la deliberaziun a man da la cumünanza d'urna dals 21 december 2014.

990 300

PROMOZIUN DA CULTURA
Grotta da cultura; fatschada dal stabilimaint a Schigliana

Ils respunsabels han inoltrà offertas per piturar nouv la fatschada ed insomma per effeuar amo alchünas lavuors externas. Ils cuosts, seguond offerta, s'amuntan a fr. 4'000.00. Sent Turissem surpiglia fr. 450.00 e la Grotta surpiglia d'effeuar alchünas lavuors pella somma da ca. fr. 400.00. I rest'uschè üna somma a charg dal cumün da fr. 3'150.00.

Il cussagl va d'accord in fatschenda e conced'il credit bsögnaivel. La somma dals cuosts restants vain squintada culla contribuziun da fr. 5'000.00, cha Sent Turissem survain, voul dir cha per quist on as redüa quella sün fr. 1'850.00.

991 830 TURISSEM
Surveglianza da la rait da sendas / BAW

Armon Nuotclà, chi accumuliva quella lezcha vaiva demischiunà. Sclerimaints tanter ils manaders tecncics da las 6 fracziuns demuossan, cha mincha fracziun es responsabla in fatschenda. Uschè decid'ìl cussagl da publichar l'incumbenza i'l prossem Mas-chalch.

992 620.314 Mantegnimaint vias
Proget sanaziun via da god Uina 4/5; surdatta da las lavuors d'impresari (SIE Sent 2014/15)

Als 11 avuost 2014 vaiv'ìl cussagl decis da surdar las lavuors a l'impraisa Mario, Ramosch. Sün pretaisa dal servezzan forestal dal Grischun meridional, Zuoz decid'ìl cussagl da retrar subit la surdatta da lavuors da la ditta Mario, Ramosch e da surdar quella al seguond ot offerent, la ditta Lazzarini SA.

993 300 PROMOZIUN DA CULTURA
Cronica da Sent; ingaschamaint da Martin Pernet

Martin Pernet s'ha ingaschè in möd exemplaric a regard l'ir in tschercha da sponsurs. El ha raggiun il grond böt, dimena da ramassar la somma considerabla da fr. 100'000.00, la quala ais uossa dafatta surpassada. Il cussagl ais da l'avis, ch'ün simil ingaschamaint es degn da gnir onurà e decida da far a Martin Pernet ün regal.

994 740 SUNTERI E SEPULTÜRAS
Dumonda per üna fossa d'urna

Seguond reglamaint da sepultura sun las premissas accumulidas, uschè cha'l cussagl conceda quel permiss.

995 DIVERSAS SCHEFS

Emil Poo / desditta dal prà in Tuffarolas

E. Poo ha inoltrà la desditta da la fittanza pel prà manzunà. Il cussagl piglia cogniziun e decida da publichar quella i'l prossem Mas-chalch.

Società Chau Chau SA / restorant Chilly Hub

Quella ha orientà in scrit, cha davo avair fat ponderaziuns e sclerimaints a reg. las investiziuns bsögnavlas per üna dürada plü lunga a Sent, es ella gnüda a la conclusiun cha quellas nu stan in relaziun. Uschè ha la società decis da müdar lö e da transferir lur stabilimaint i'l cumün da Valsot (Ramosch). Il cussagl piglia cogniziun da quai.

996 ORIENTAZIUNS

Sairada inscunter da la società Sturnels Sent

M. Werro, D. Jann e l'actuar, M. Fallet sun stats a disposiziun quella saira ed ha pudü respunder ad üna blerüra da diversas dumondas in connex culla fusiun dals cumüns, mo eir in connex culla problematica da seguondas abitaziuns. Id ais stat ün'interessanta sairada e tuot ils preschaints (il bel nomer da 90 personas) sun stats fich cuntaints. Ruedi Aeschbacher ha manà tras la sairada.

Il president da la società, Ruedi Wenger, ha surdat al cumün ün schec sur da la somma da fr. 8'800.00. Quella somma han ils Sturnels ramassà sco contribuziun vi dals cuosts da sanaziun dal bügl a Schigliana, dimena üna gesta fich admirabla e generusa.

In seguit a la part uffiziala as haja pudü far amo in möd individual discussiun sur da l'ün e l'oter tema a chaschun da l'aperitiv dedichà dal cumün. Il cussagl ingrazch'als Sturnels da Sent per quella bella contribuziun e pella bainvuglientscha demuossada invers il cumün.

SELVA / invid ad occurrenzis regiunalas d'infuormaziun sur dal god

Il schef da god, M. Caviezel, manzuna, cha'l silvicultur, Mario Riatsch fat part.

Marianne Werro

Ella vaiva laschà pervgnir als collegas dal cussagl diversas infuormaziuns sur da divers temas e puncts. Il cussagl ha tut cogniziun e va eir d'accord cul manuscrit.

Comitè «schi a la refuorma dal territori»

Da quella vart ais gnüd'inoltrada la dumonda pella commembranza. Il cussagl decida da na far part a quella.

Giubileum classa da sport dal IOF / posiziun dals 3 magisters dal s-chalin ot a J.D. Parolini

In connex cun seis pled da festa vaiva J.D. Parolini s'exprimà in möd, ch'el chatta plü important da sustgnair la scoula media co ils s-chalins ots illas fracziuns. Lasupra vaivan ils 3 magisters dal s-chalin ot da Sent reagi in scrit pro l'oratur. Il cussagl ha tut cogniziun da quella charta.

997

VARIA

Tschaina dal cumün 2014

Per evitar retards e collisiuns da termin decid'il cussagl fingià uossa da fixar quel termin. Quel vain fxà sün venderdi, als 5 da december 2014.

L'actuar:
Marco Fallet

Il capo:
Albert Mayer